




40. godišnjica Olimpijskih igara u Sarajevu





Sarajevo je pokazalo svijetu kako jedan mali grad može organizovati Igre koje su ostale u sjećanju kao jedne od najbolje organizovanih u istoriji. Sarajevo će zauvijek biti zapisano zlatnim slovima u istoriji olimpizma.

Huan Antonio Samarán



UVOD

Godina 2024. označava značajan jubilej za olimpijsko Sarajevo i cijelu Bosnu i Hercegovinu – 40 godina od održavanja Zimskih olimpijskih igara 1984. godine. Bio je to trenutak kada je Sarajevo postalo svjetski centar sporta, izvrsnosti, mira i prijateljstva, povezujući ljude svih nacija i kultura kroz čaroliju zimskih sportova. To nije bio samo sportski događaj već simbol nade, ambicije i zajedništva. Za mnoge, Sarajevo je 1984. bilo potvrda da, unatoč teškim okolnostima, ljepota i snaga ljudskog duha mogu stvoriti nešto veličanstveno.

Na četiri decenije od tih dana ponosa i slave, sjećanja na olimpijske trenutke i ljude koji su ih stvarali ostaju snažna. Zimske olimpijske igre u Sarajevu nisu bile samo sport i medijski spektakl – one su bile duboko povezane s dušom ovog grada, s njegovim tradicijama, njegovim stanovnicima, njihovom hrabrošću i njihovom sposobnošću da prevaziđu sve izazove.

Kroz fotografije ova knjiga nastoji sačuvati od zaborava ključne trenutke obilježavanja 40. godišnjice ZOI Sarajevo 1984, ali i osvrnuti se na naslijeđe koje je olimpijada ostavila iza sebe. Olimpijske igre u Sarajevu 1984. godine su bile događaj koji će ostati u srcima ljudi i pokazatelj da

je sport most koji povezuje, ujedinjuje i daje nadu. Obilježavanje ove godišnjice podsjeća nas na sve ono što je Sarajevska olimpijada značila i na snagu koju ona i danas ima kao simbol zajedništva i nade. Zato se uvijek tako rado vraćaju u Sarajevo naši dragi olimpijci, treneri, sportski radnici i svi prijatelji iz regije i cijeloga svijeta.

Obilježavanjem 40. godišnjice ZOI želimo da Sarajevo i dalje bude grad izvrsnosti, poštovanja, prijateljstva i zajedništva te svijetle olimpijske budućnosti.

Knjigu posvećujemo najzaslužnijima što smo “ponosni Bosanci i Hercegovci” i svima koji su učinili da se ideja uspješne organizacije sa riječi pretvori u djela. Onima koji su etabrirali i osnažili ideju “Sarajevske olimpijade” kao što su Žarko Zečević, Ahmed Karabegović, Ante Sučić i Uglješa Uzelac, a koji su bili podržani od Branka Mikulića i privrednika na čelu sa Emerikom Blumom, uz međunarodnu podršku Artura Takača i Pavla Lukača. Knjigu posvećujemo i Nj.E. Huanu Antoniu Samaranu čije djelo je zauvijek upisano u srca svakog Sarajlije i Bosanca i Hercegovca. Knjigu posvećujemo nama i svim budućim generacijama da znaju da smo bar na kratko bili centar svijeta.

Akademik Izet Rađo, predsjednik OK BiH

SADRŽAJ



KAKO JE SVE POČELO...

8

- ZOI '84 10
- Fotogalerija ZOI '84 20



20 GODINA ZOI '84

34

- Fotogalerija 20 godina ZOI '84 36



40 GODINA ZOI '84

40

- Potpisivanje Sporazuma 42
- Najava događaja 44
- Poruka predsjednika MOK-a 46
- Posjeta ZETRI 48
- Prijem OHR 50
- Svečana Akademija 52
- Govor predsjednika OK BiH 58
- Olimpijska planina Trebević 60
- Posjeta Olimpijskom muzeju 62



- Koktel u Olimpijskom muzeju 64
- Posjeta Visočkim piramidama 68
- Jure Franko 72
- Olimpijska planina Bjelašnica 74
- Olimpijska planina Jahorina 78
- Emisija BHRT 80
- Govor višeg savjetnika Predsjednika MOK-a 82
- Torvill i Dean 84
- Ponosni partneri OK BiH 88
- OK BiH i Coca-Cola HBC B-H 90
- Toyota 40 godina ZOI '84 92
- Govor gradonačelnice Sarajeva 94
- Prijem i konferencija za medije 96
- Sarajevo Olympic Week 2024 98



ČESTITKE POVODOM 40 GODINA ZOI '84

108

- EOC EU Office 110
- Olimpijski komitet Srbije 111
- Olimpijski komitet Slovenije 112
- Olympic Solidarity 114
- Davor Suhan 115





KAKO JE SVE POČELO...



Četrnaeste Zimske olimpijske igre održane su u Sarajevu od 08. do 19. februara 1984. godine. Bile su to, kako je ocijenio tadašnji predsjednik Međunarodnog olimpijskog komiteta Huan Antonio Samaranch (Juan Antonio Samaranch), najbolje organizovane Zimske olimpijske igre.



Na putu do ovog grandioznog djela, glavni grad BiH je morao proći kroz faze maštanja i osporavanja, nevjerice i sumnje, ubjeđivanja i potvrđivanja, i što je najvažnije - radnog zanosa i pobjedničkog slavlja. Dugo je snivan san o najljepšoj zimskoj bajci, dugo su sportski uposlenici razvijali svoje planove da bi na kraju objavili kandidaturu, dobili Igre i na veličanstven način ih organizovali.

Prve ideje o ovom hrabrom poduhvatu zaiskrile su krajem šezdesetih i početkom sedamdesetih godina prošlog stoljeća u studijama o razvoju skijanja i zimskog turizma u Bosni i Hercegovini. U raspravama o njima 1970. došlo se do zaključka da sarajevski region ima prirodne mogućnosti za organizovanje Igara, ali da treba uporno raditi na svim poljima kako bi maštanje postalo realnost.

Sretna je okolnost bila da je baš u to vrijeme startovao Program zaštite čovjekove okoline kroz koji je u nekoliko godina realizovan veliki investicioni zahvat na rekonstrukciji i proširenju kompletne infrastrukture grada, sa uvođenjem gasnog sistema, čime je Sarajevo dobilo mnogo toga što mu je nedostajalo da bi se kandidovalo za domaćina najveće sportske manifestacije. Sama želja o



Zimske Ol, Sarajevo 1984, Ceremonija otvaranja - Slova formirana od učesnika



organizovanju ZOI bila je povod jednom novom izazovu sa tačno utvrđenim ciljem - dobiti Igre! U aprilu 1971. završene se prve analize o društvenoj opravdanosti i mogućnostima organizovanja ZOI u Sarajevu. Materijal je s pažnjom razmatran u užem krugu odgovornih ljudi, ali iz objektivnih razloga nije zvanično predstavljen javnosti. Prije tog čina, trebalo je izgraditi atmosferu povjerenja i motivisati sve snage bez kojih se poduhvat ne bi mogao izvesti. To je potrajalo sve do marta 1977. kada je elaborat inoviran i upućen Predsjedništvu BiH. Ono ga je razmatralo na sjednici 13. maja, ali ga nije usvojilo, nije čak ni istaklo ZOI kao činjenicu. No, donijelo je zaključak da treba nastaviti aktivnosti u sagledavanju mogućnosti izgradnje zimskih centara u Republici. A to je bilo dovoljno radnoj grupi da, uz prikupljanje širih informacija, pogotovo o ekonomskim parametrima, dalje razvija ideju o kandidaturi. Aktivnost je intenzivirana, pa je radna grupa prerasla u Pripremni komitet, kojim je rukovodio bivši gradonačelnik i predsjednik Skijaškog saveza BiH Dane Maljković. Do 10. septembra 1977. polazni materijal je dobio svoju konačnu formu, nakon čega su sačinjeni tekst kandidature i pisma Jugoslovenskom olimpijskom komitetu, Jugoslovenskom savezu za fizičku kulturu, Skupštini Grada Sarajeva, Republičkom Izvršnom vijeću i Saveznom Izvršnom vijeću, jer se bez njihovih saglasnosti nije mogla nastaviti procedura kandidovanja. Ovim je sa "olimpijskog elaborata" skinut veo tajnosti i 14. oktobra 1977. u novinama

je osvanula vijest da će se Sarajevo kandidovati za organizaciju Zimskih olimpijskih igara 1984. U tom trenutku znalo se da "bijelu olimpijadu" žele i Francuska, Japan, Švedska i Čehoslovačka, i da se u toj konkurenciji Jugoslaviji i Sarajevu daju male šanse. Međutim, tako nisu mislili kreatori našeg olimpijskog projekta. Bili su uvjereni da ih ono što rade vodi do cilja. Brinule su ih samo saglasnosti koje su postepeno i sporo stizale, a vrijeme je brzo proticalo, pa su 19. novembra 1977. Međunarodnom olimpijskom komitetu uputili pismo s molbom da se rok za podnošenje kandidature pomjeri sa 01. na 31. decembar. Istovremeno, Pripremni komitet je 21. novembra 1977. prerastao u Kandidacioni, a tim stručnjaka je do polovine decembra završio sve odgovore na upitnike MOK-a i utvrdio lokacije sportskih i drugih objekata neophodnih za održavanje Igara. Tadašnjem predsjedniku MOK-a, lordu Kilaninu (Killanin), to je bilo dovoljno da se uvjeri kako je Sarajevo ozbiljan kandidat.

Posebnu garanciju tome dalo je Savezno Izvršno vijeće, koje je 24. novembra otklonilo sve dileme i objavilo da se Grad Sarajevo i Jugoslovenski olimpijski komitet prijavljuju kao kandidati za organizaciju Igara 1984.

Kandidatura je u kancelariji MOK-a u Lozani (Lausanne) osvanula 03. januara 1978. Uslijedile su potom brojne inspekcije međunarodnih eksperata koji su u Sarajevu provjeravali realnost

Zimske OI, Sarajevo 1984,
posjeta MOK-ove delegacije
Sarajevu, Lord KILLANIN,
predsjednik MOK-a (do
1980), Juan Antonio
SAMARANCH, predsjednik
MOK-a (od 1980), Anton
SUČIĆ, potpredsjednik
Organizacionog komiteta OI





Izgradnja Olimpijskog sela Mojmiilo i Skijaške skakaonice na Igmanu

obećanja i procijenjivali mogućnosti našeg glavnog grada. Sve je to trajalo do 18. maja kada je MOK na zasjedanju u Atini donio konačnu odluku. Tri grada bila su u konkurenciji: Saporu, Geteborg (Göteborg) i Sarajevo. U prvom krugu Saporu je dobio 33, Sarajevo 31, a Geteborg 10 glasova, dok je jedan listić bio nevažeći. Eliminacijom Geteborga, članovi MOK-a u drugom krugu opredjeljivali su se između Sapura i Sarajeva. U ovom nadmetanju Sarajevo je sa 39:36 odnijelo pobjedu i dobilo Igre. Lord Kilanin svečano je objavio: "Sarajevo, Jugoslavija, domaćini su Zimskih olimpijskih igara 1984. godine." Čestitke Sarajevu stizale su sa svih strana, a grad je ubrzo postao ogromno gradilište, jer je u trenutku

dobijanja Igara imao samo jednu ledenu plohu u "Skenderiji" i skroman Ski-centar na Jahorini. Sve drugo trebalo je graditi. I to udarnički.

Iz godine u godinu nicali su prekrasni objekti: Zetra, staza za bob i sankanje, skakaonice, dvorane, "bijeke pruge", žičare, hoteli, Olimpijsko selo i novinarsko naselje sa 2.640 stanova, saobraćajnice u pravcu planina i 28 zimsko-sportskih centara u Republici, koji su potvrdili da je Olimpijada, uz sve humanističke i sportske domete, za BiH i razvojna šansa.

Svi sportski objekti završeni su i opremljeni do jeseni 1982. Uporedo je konstituisana i organizaciona struktura, pa je 24. aprila 1980. formiran

**Zimske Ol,
Sarajevo
1984,**
Sarajevo
pod budnim
okom
Olimpijske
maskote
Vučko



Zimske OI, Sarajevo 1984, skijaški skokovi - Matti NYKANEN



Olimpijski komitet Bosne i Hercegovine

Organizacioni komitet sa 79 članova, na čelu sa predsjednikom Brankom Mikulićem i generalnim sekretarom Ahmedom Karabegovićem. Dotadašnji predsjednik Privremenog komiteta, formiranog 13. jula 1978., Anto Sučić, imenovan je za predsjednika Izvršnog komiteta, a 21. decembra 1981. Artur Takač je postavljen za tehničkog direktora ZOI. Sa 4.200 kolektivnih i 1.200.000 pojedinačnih donatora u zemlji i inostranstvu, sa omladinskim radnim brigadama i desetak hiljada volontera neposredno uključenih u pripreme Olimpijade, Sarajevo je, ostvarujući i finansijski suficit od 12 miliona dolara, sve zadatke uspješno obavilo i spremno dočekalo veliki dan, 08. februar 1984.

Na Olimpijskom stadionu Koševo, tačno u 14:30 sati fanfare su označile početak svečanosti. U ime organizatora goste je pozdravio predsjednik Organizacionog komiteta Branko Mikulić, a predsjednik MOK-a Huan Antonio Samarán, uz najljepše želje svjetske olimpijske porodice, najavio je da će svijet biti svjedok "velikih Igara" u Sarajevu. Potom je predsjednik Predsjedništva SFRJ Mika Špiljak i službeno otvorio ZOI.

Olimpijski plamen u veliku buktinju pretvorila je klizačica Sanda Dubravčić, a olimpijsku zakletvu u ime svih učesnika položio je as bijelih staza Bojan Križaj, te u ime sudija Sarajlija Miodrag Perović. Takmičenja su startovala dan ranije, uz snažnu univerzalnu i humanističku poruku gradonačelnika Sarajeva i Los Angelesa, Uglješe Uzelca i Toma



**Zimske OI, Sarajevo 1984,
Govor na Ceremoniji otvaranja**

Sarajevo 1984
Zimske OI,
Umjetničko
klizanje
Katarina WITT
(GDR) prvo
mjesto



Olimpijski komitet Bosne i Hercegovine

Bredlia (Bradley), koju su na simboličan način uputili svijetu. Da mir vlada među zemljama i narodima, na dobrobit mladih koji nose plamen sportskih i humanih vrijednosti inspirisanih olimpizmom. Njeni sportski junaci, prije svih, bili su Skandinavci – Finkinja Marja-Lisa Hemeleinen (Hämäläinen) Kirvesiniemi sa zlatom na pet, deset i dvadeset kilometara, te bronzom u štafeti 4x5 km u skijaškom trčanju, i Šveđanin Gunde Svan (Swan), koji je na Igmanu trijumfalno završio trku na 15 km i štafetu nadmetanje 4x10 km, a u trci na 50 km osvojio srebrnu medalju.

Pamte se, naravno, i drugi slavodobitnici: nezaboravna ljepotica umjetničkog klizanja Katarina Vit (Witt) iz tadašnjeg DDR-a, američki spustaš Bil Džonson (Bill Johnson) i alpski skijaši braća Fil i Stiv Mer (Phillip i Steven Mahre), skijašica Debi Armstrong (Debbie), britanski plesači u umjetničkom klizanju Džejn Torvil i Krisofer Din (Jayne Torvill i Christopher Dean), italijanska slalomašica Paolet Magoni, finski skakač Mati Nikenen (Matti Nykänen) i desetine drugih asova, koji su na 97 takmičenja osvojili 222 medalje.

Među njima je i Jure Franko, sa srebrom u veleslalomu, prvom jugoslovenskom medaljom na Zimskim olimpijskim igrama. Ekipe SFRJ imala je 72 člana, u kojoj su iz Bosne i Hercegovine bili biatlonci Tomislav Lopatić i Zoran Ćosić, brzoklizači Behrudin Merdović i Bibija Kerla, bobisti Boris Rađenović,

Borislav Vujadinović, Mario Franić, Nikola Korica, Ognjen i Zoran Sokolović, Siniša Tubić, Zdravko Stojnić i Mustafa Bešić (hokeji na ledu), te sankas Dajana i Suad Karajica i Dušan Dragojević, koji je na Trebeviću zabilježio do sada najbolji rezultat (16. mjesto) u istoriji bosanskohercegovačkog zimskog olimpizma.

Na veličanstven način Igre su završene 19. februara svečanom ceremonijom u Zetri, uz takt pjesme "Lijepo je bilo u Sarajevu..." i Samarantove riječi: "Doviđenja drago Sarajevo!"

Svi su bili zadovoljni: Svijet, jer je vidio do tada najbolje organizovane ZOI, i to prve u jednoj socijalističkoj zemlji i bez bojkota; Sarajevo, jer je u olimpijski podvig, uz hrabrost i znanje, utkalo i srce i dušu. Nježna „Pahuljica“ Miroslava Antonića i odvažni „Vučko“ Jože Trobeca, znak i maskota Igara, svjedočiće o tome vijekovima.



*Zimske OI, Sarajevo
1984, Alpsko skijanje,
Jure FRANKO (YUG)
drugo mjesto, Max
JULEN (SUI) prvo
mjesto i Andreas
WENZEL (LIE) treće
mjesto*



Fotogalerija ZOI '84





“
Sarajevo je
ujedinilo svijet.
Jure Franko









Četrnaeste Zimske olimpijske igre u Sarajevu 1984. bile su Igre nadahnuća i, iznad svega, imale su svoje ljudsko lice, ono najviše što ljudski rod može doseći kada djeluje u harmoniji na zajedničkom mirnodopskom rezultatu... Sarajevo će uvijek imati specijalno mjesto u srcu olimpijskog pokreta.

Žak Rog





20 GODINA ZOI '84

2004. godine obilježene su dvije decenije održavanja ZOI Sarajevo '84. U znak sjećanja na tadašnje olimpijske pobjede i entuzijazam organizovane su mnogobrojne manifestacije, izložbe, seminari o sportu i kulturi, kao i sportski događaji. Proslava godišnjice naglasila je važnost sporta u promovisanju mira i zajedništva, posebno u postkonfliktnom društvu, te je potvrdila trajnu baštinu Olimpijskih igara u životima mnogih ljudi. Obilježavanje ovog značajnog jubileja podsjetilo je na olimpijske ideale: prijateljstvo, poštovanje i izvrsnost, te pokazalo da je Sarajevo i dalje grad koji ponosno nosi olimpijski duh.







Kad gledam snimke
paljenja baklje u Sarajevu, to me
uvijek dirne. Bio je to poseban
događaj za mene.

Sanda Dubravčić



SARAJEVO 84

40 YEARS



40 GODINA ZOI '84

Dok gledate u ovu svijetlu budućnost, dopustite mi da ponovim da uvijek možete računati na Međunarodni olimpijski komitet kao vašeg partnera u promovisanju zajedničkih olimpijskih vrijednosti, mira i solidarnosti. Jer samo udruživanjem ruku u partnerstvu možemo uistinu živjeti naš novi olimpijski moto: Brže, više, jače, zajedno! U ovom olimpijskom duhu, želim vam prekrasnu proslavu godišnjice i sve najbolje u sljedećih 40 godina i još mnogo više.

Tomas Bah, predsjednik MOK-a



POTPISIVANJE Sporazuma

OK BiH potpisuje Sporazum s
Gradom Sarajevo povodom 40. godišnjice
Olimpijskih igara u Sarajevu.



NAJAVA DOGAĐAJA

40. godišnjica Olimpijskih igara u Sarajevu / 40 godina ZOI '84



Olimpijski komitet Bosne i Hercegovine



PORUKA PREDSJEDNIKA MOK-a

Tomas Bah

povodom proslave 40. godišnjice Olimpijskih igara u Sarajevu

Poštovani predsjedniče Olimpijskog komiteta Bosne i Hercegovine, dragi prijatelju profesore doktore Izete Rađo, Poštovani prijatelji,

Dok se okupljate na proslavi 40. godišnjice Zimskih olimpijskih igara u Sarajevu 1984. svima vama, olimpijskoj zajednici Bosne i Hercegovine, želim od srca čestitati. Ova godišnjica emotivan je trenutak za cijeli olimpijski pokret jer ste kroz dugu i često burnu historiju Sarajeva doživjeli čitavu lepezu ljudskih emocija. Od velike radosti i nade koju nam samo sport može dati, do boli i patnje rata. Ali što je najvažnije, naslijeđe Zimskih olimpijskih igara u Sarajevu 1984. predstavljaju snagu sporta u prevladavanju pošasti rata i daje nam nadu i snagu da oblikujemo bolju budućnost.

Zimske olimpijske igre u Sarajevu 1984. izdvojile su se po tome što su na vrhuncu Hladnog rata okupili u mirnom nadmetanju najbolje sportiste zimskih sportova od političkih suparnika i zakletih neprijatelja. Ovo je prvo izdanje Olimpijskih igara pod predsjedanjem mog prethodnika Huana Antonia Samarana koji je poslao prijeko potreban signal nade podijeljenom svijetu. Da, moguće je žestoko

se natjecati jedni s drugima i živjeti mirno zajedno pod istim krovom u isto vrijeme. Olimpijske igre u Sarajevu 1984. bile su besprijekorno organizovane igre, sam predsjednik Samarana je Igre opisao kao prekrasan uspjeh. Stoga, iz najboljih razloga, ove Zimske olimpijske igre bile su i nastavljaju biti zajednički izvor ponosa za sve stanovnike Sarajeva iz svih etničkih i socijalnih sredina i svih generacija.

Ovaj ponos na vaše olimpijsko naslijeđe prevladavao je čak i tokom najmračnijih sati rata koji je tako tragično zahvatio Sarajevo samo nekoliko godina kasnije. Ratovanje je fizički uništilo većinu olimpijskih borilišta, ali nije moglo ugasiti olimpijski duh u srcima vaših ljudi. Kad su puške utihnule, obnovili ste svoju olimpijsku baštinu dižući se iz ratnog pepela, naslijeđe Zimskih olimpijskih igara u Sarajevu 1984. poprima još veće i dublje značenje. Jer ponovna izgradnja sarajevskog olimpijskog naslijeđa također je primjer solidarnosti koja definiše našu olimpijsku zajednicu. Podrška obnovi došla je iz Međunarodnog olimpijskog komiteta iz vašeg bratskog olimpijskog grada, Barselone, iz Organizacionog odbora Zimskih olimpijskih igara u Lillehammeru 1994. i Torinu 2006., između ostalih.

Olimpijski komitet Bosne i Hercegovine

Zahvaljujući našim zajedničkim naporima, olimpijsko naslijeđe ponovo blista u Sarajevu. Nekadašnje Olimpijsko selo dom je stotinama obitelji. Danas, obnovljena Olimpijska dvorana Huan Antonio Samarana, nedavno obnovljeni Olimpijski muzej, govori o živoj sportskoj historiji Bosne i Hercegovine u svim svojim aspektima i čitavoj lepezi ljudskih emocija. Uz uspješnu organizaciju Europskog zimskog festivala mladih 2019. (EYOF-a), na impresivan ste način pokazali kako svoju olimpijsku ostavštinu prenosite u budućnost.

To je za mene naslijeđe Sarajeva u pravom smislu riječi. Vaše olimpijsko naslijeđe nas uči o snazi sporta u oblikovanju puta nade prema boljoj budućnosti.

Na ovu vrlo emotivnu obljetnicu, dopustite mi da jednostavno kažem, hvala. Hvala Nacionalnom olimpijskom komitetu i cijeloj olimpijskoj zajednici Bosne i Hercegovine za očuvanje ove dragocjene baštine. Mnogo vam hvala što živite u ovom olimpijskom duhu 1984., duhu okupljanja mirno kroz sport, unatoč svim razlikama koje možda imamo. Hvala vam što nosite ovu olimpijsku ostavštinu u budućnost.

Dok gledate u ovu svijetlu budućnost, dopustite mi da ponovim da uvijek možete računati na Međunarodni olimpijski komitet kao vašeg partnera u promovisanju zajedničkih olimpijskih vrijednosti, mira i solidarnosti. Jer samo udruživanjem ruku

u partnerstvu možemo uistinu živjeti naš novi olimpijski moto: Brže, više, jače, zajedno!

U ovom olimpijskom duhu, želim vam prekrasnu proslavu godišnjice i sve najbolje u sljedećih 40 godina i još mnogo više.

Iskreno vam čestitamo!



POSJETA ZETRI

Predstavnici Međunarodnog olimpijskog komiteta i specijalni gosti u obilasku Zetre, olimpijskog borilišta koje je ugostilo hokej na ledu, umjetničko klizanje, brzo klizanje i ceremoniju zatvaranja tokom ZOI Sarajevo 1984.



PRIJEM OHR

Visoki predstavnik za BiH, N.J.E. Christian Schmidt ugostio je predstavnike međunarodnih sportskih organizacija, OK BiH i predstavnika vlasti BiH povodom 40. godišnjice ZOI Sarajevo '84.



SVEČANA AKADEMIJA

U čast obilježavanja 40 godina ZOI '84 u
Narodnom pozorištu Sarajevo održana je
Svečana akademija.





Željko Komšić,
član Predsjedništva BiH



prof. dr. Izet Rađo, akademik
Predsjednik OK BiH



Pere Miro,
viši savjetnik Predsjednika MOK-a



Jure Franko, osvajač prve medalje u
alpskom skijanju za Jugoslaviju na ZOI '84



Raffaele Pagnozzi,
Generalni sekretar EOK-a



Kenan Magoda,
Ministar kulture i sporta Kantona Sarajevo



Benjamina Karić,
Gradonačelnica Grada Sarajeva



Jasmin Ademović,
Predsjedavajući Gradskog vijeća Grada Sarajeva



GOVOR PREDSDJEDNIKA OK BIH

Akademik Izet Rađo

povodom proslave 40. godišnjice Olimpijskih igara u Sarajevu

*Poštovani predsjedniče Komšiću,
Poštovani predstavnici države Bosne i
Hercegovine,
Poštovana gradonačelnice Grada Sarajeva,
Poštovane ekscelencije ambasadori, visoki
zvaničnici Međunarodnog i Evropskog olimpijskog
komiteta, predsjednici i generalni sekretari
regionalnih Olimpijskih komiteta
Poštovani sportisti i sportistkinje,
Dame i gospodo,
Dragi Prijatelji,*

Olimpijski plamen, uprkos svim iskušenjima, 40 godina vjerno obasjava Sarajevo i Bosnu i Hercegovinu, ali i snažnu viziju Olimpijskog komiteta Bosne i Hercegovine koja se napaja sa izvora iznjedrene misli utemeljitelja modernih Olimpijskih igara Pjera de Kubertena.

Citius, Altius, Fortius - Brže, više, snažnije... kao poruka čovječanstvu, da Olimpijski plamen prati svoj tok kroz vijekove za dobrobit čovječanstva sve vatrenije, hrabrije i čistije.

Svako od vas ima svoja zabilježena sjećanja na Zimske olimpijske igre koje su održane u Sarajevu te 1984. godine.

Mnogi će se i ove noći sjetiti tog doživljenog varljivog mjeseca februara, pogleda ka nebeskom beskraj u potrazi za željenim pahuljama snijega.

Sjećanja čuvaju i riječi predsjednika Međunarodnog olimpijskog komiteta, bezvremenog prijatelja Bosne i Hercegovine, Huana Antonija Samarana: "Doviđenja, drago Sarajevo!" uz zahvalnost za izvrsnost organizovanja Igara. Ovo je iznimna prilika, da se zahvalimo svim ljudima koji su imali smjelost i viziju da se kandiduju i organizuju najbolje olimpijske igre do tada.

Citius, Altius, Fortius - Brže, više, snažnije.

Uz podršku naših prijatelja iz Evropskog olimpijskog komiteta predvođenih predsjednikom dr. Janezom Kocjančičem, rasla je tih godina naša olimpijska porodica, želeći ponovno obasjati Olimpijskim plamenom Sarajevo i Istočno Sarajevo uz Evropske olimpijske igre mladih.

Kada dijelimo zajedničku viziju, sve je moguće. Te 2019. godine plamen mira obasjao je naše olimpijske planine.

Želim vas zamoliti da na trenutak zamislite tu ljepotu obilja odvažne mladosti koja je nizala korake na

sarajevskim ulicama, uz trgove, parkove i posebnost njihovih emocija kojima su bilježili te godine u našem Sarajevu i Istočnom Sarajevu.

Njihova mladost kao snaga, kao utjeha, u ovom vremenu iskušenja za čovječanstvo, uz sva naša nadanja da će i oni stvarati samo dobro, ne zaboravljajući pouku Pjera de Kubertena, kako nije važno samo pobijediti, već i učestvovati. Kako nije važna stvar u životu samo trijumf, već i borba, kako suštinska stvar nije pobijediti već boriti se u dobru jer samo umnožavanjem ovih principa moguća je izgradnja snažnog i hrabrijeg i, iznad svega, velikodušnijeg čovječanstva.

Citius, Altius, Fortius - Brže, više, snažnije.

Dr. Tomas Bah, predsjednik Međunarodnog olimpijskog komiteta nam poručuje: *"Samo udruživanjem ruku u partnerstvu možemo uistinu živjeti naš novi olimpijski moto brže, više, snažnije, ali i zajedno!"*

Zajedno smo i ove noći. Bezvremeni Olimpijski plamen i mi, a u nama želja za naše olimpijske planine, za našu Bosnu i Hercegovinu, koja će ponovno ispisati na koricama svoje knjige o Olimpizmu svoju olimpijsku priču uz naslov - YOG, Svjetske zimske olimpijske igre mladih 2032. godine.

Želim vjerovati kako je to i vaša želja, želja za obnovom olimpijskih borilišta, želja za Olimpijskim

plamenom koji će ponovno obasjati Sarajevo, ljubavlju, srećom i mladošću onih sportistkinja i sportista koji će doživjeti svu posebnost naših olimpijskih planina.

A ako ne napravimo hrabro novi olimpijski iskorak za deset godina bit ćemo više razočarani onim što nismo učinili, nego onim što jesmo. Stoga je bitnost u stalnom isplavljanju iz životne luke, jer samo taj čin nam omogućava da se otisnemo ka ovozemaljskoj pučini gdje nas očekuje naša vizija, a naša vizija je da uz ime našeg Sarajeva i Istočnog Sarajeva ispišemo i ime - YOG, Svjetske zimske olimpijske igre mladih 2032. godine.

Dragi Prijatelji,

Takvo je i naše Sarajevo! Grad koji ne zaboravlja svoju prošlost, grad koji čuva svoju sadašnjost, grad koji misli o svojoj budućnosti.

Dozvolite mi da završim uz riječi sarajevskog pjesnika Izeta Kike Sarajlića o našem Sarajevu: *"Ovo je grad u kome možda i nisam bio najsrećniji, ali u kome i kiša kada pada - nije prosto kiša..."*

Zahvaljujem!



OLIMPIJSKA PLANINA Trebević

Predstavnici Međunarodnog olimpijskog komiteta i Evropskih olimpijskih komiteta posjetili su i olimpijsku bob stazu na Trebeviću.



POSJETA Olimpijskom muzeju



KOKTEL u Olimpijskom muzeju

Koktel za Olimpijsku porodicu upriličen u prostorijama Olimpijskog muzeja okupio je prijatelje iz MOK-a, EOK-a, regionalnih NOK-ova, kao i predstavnike vlasti u BiH, te olimpijce, zaslužne sportiste i sportske radnike.





POSJETA Visočkim piramidama

Gosti su za vrijeme boravka u Sarajevu imali priliku posjetiti Arheološki park Ravne 2 u Visokom, gdje ih je ugostio dr. Semir Osmanagić.





JURE FRANKO

nasmijao sve u Narodnom pozorištu:

“Vještačka inteligencija, dođi u Sarajevo i na burek”

Slavni jugoslovenski skijaš Jure Franko obratio se prisutnima na Svečanoj akademiji u Narodnom pozorištu povodom 40. godišnjice održavanja Zimskih olimpijskih igara koje su naš glavni grad 1984. promovirale u sportski centar svijeta.

“Rekao sam nekoliko puta, četiri puta sam se rasplakao od jučer otkako sam došao, a večeras zamalo i peti put. Eto koliko ima emocija. Ne znam kako uvijek organizatori dođu na ideju da puste nas sportiste da pričamo. Evo prva greška, umjesto da ponese sa sobom govor, donio sam program. Rijetko ko danas čita ove programe.

Hvala vam na ovoj velikoj časti, emociji i moram da istaknem prije nego što krenem s govorom, u ovom govoru nisam upotrijebio vještačku inteligenciju, tako da je sve što ću vam pročitati, doći će od srca i iskreno.

Bio sam u kafani s prijateljem i kaže on meni: “Znaš li ti šta je vještačka inteligencija?” Kaže mi dalje, “Vidim ja da ti nemaš pojma i sad ću ti objasniti. To je fenomenalno jer ti uneseš podatke i postaviš pitanje, a on ti odmah izbací odgovore i rješenja.” Vratim se kući i da ga isprobam, uneseš pitanje: “Ko je Jure

Franko?”, a vještačka inteligencija mi odgovara: “Da li ima još koji podatak?” Razmišljam i kažem: “Dođi vještačka inteligencija kod nas u Sarajevo i na burek, pa ćeš dobiti još koji podatak.”

Ali, pošto je ona vrlo inteligentna, a mi uz to imamo još empatije i strpljenja, ja sam nekako zaključio da njoj puno toga još fali. Tu nedostaju sve Sarajlije, cijela Bosna i Hercegovina, čarobne planine, lopate kojima se rješavala Olimpijada, nedostaju djevojčice,



majke, bake i žene koje su danju i noću donosile kafu, čaj, kekse onima koji su radili da se ostvari Olimpijada. Nedostaje radost te djece, nedostaju taksisti, kuhari, inženjeri, treneri, novinari, kamermani, sportaši. Nedostaje raja, nedostaje i 20 miliona onih s kojima smo bili u zajedničkoj državi i s kojima svaki ima priču svoju o Sarajevu.

Ne može vještačka inteligencija obuhvatiti naše kolektivno sjećanje, sve naše emocije, radost i ponos u briljantnom Sarajevu, koje je kasnije proglašeno

najboljim Olimpijskim igrama u historiji. Draga moja vještačka inteligencija, pogledaj malo po sali, raspitaj se po kafanama Bašćaršije, raspitaj se po Bosni i Hercegovini, raspitaj se po planinama i dolinama, po našoj bivšoj državi i po Evropi, po cijelom svijetu, pa ćeš dobiti još koju informaciju za svoju bazu podataka. Pa da možeš odgovoriti na to jednostavno pitanje koje sam ubacio na ChatGPT. Hvala vam što ste mi dali mogućnost da budem dio te priče te da ostanem barem još 40 godina pa i puno, puno dalje”.



OLIMPIJSKA PLANINA Bjelašnica

Svečanost otvaranja skijaške staze "Jure Franko" na Bjelašnici povodom proslave 40. godišnjice Olimpijskih igara '84.



**Volimo Jureka
više od bureka**

bio je slogan kojim su Sarajlije pozdravile povratak legendarnog Jure Franka na olimpijskoj planini Bjelašnici.





“
Kada radimo
zajedno, sve je moguće.

Izet Rađo



OLIMPIJSKA PLANINA Jahorina

Svečano druženje gostiju, olimpijaca, sportista, sportskih radnika i zvanica upriličeno je i na olimpijskoj planini Jahorini.





GOVOR VIŠEG SAVJETNIKA PREDJEDNIKA MOK-a

Pere Miro

povodom 40. godišnjice Olimpijskih igara u Sarajevu

*Dame i gospodo,
Dragi Prijatelji,*

Prije svega, želio bih vam prenijeti pozdrave predsjednika MOK-a gospodina Tomasa Baha i njegove najbolje želje za uspješnu proslavu 40. godišnjice Olimpijskih igara u Sarajevu. Možete biti sigurni da bi volio da prisustvuje ovoj divnoj proslavi, ali to nažalost nije bilo moguće.

Velika mi je čast i veliko lično zadovoljstvo što sam danas ovdje u njegovo ime na proslavi 40. godišnjice, po mom mišljenju, najslavnijih Zimskih olimpijskih igara u historiji olimpijskog pokreta. Tadašnji predsjednik MOK-a, gospodin Juan Antonio Samarán, rekao je na ceremoniji zatvaranja da su ovo najbolje Zimske olimpijske igre ikada organizirane. Bila je istina. I možete biti veoma ponosni na ovo.

Nisam imao priliku doživjeti te izvanredne Igre. Još nisam bio u Olimpijskom pokretu te 1984. godine i jako mi je žao zbog toga.

Ali godinama kasnije imao sam priliku da saznam i shvatim šta su te Igre značile za Grad i za cijelu planetu, kao i njihovo veliko naslijeđe.

U periodu od septembra 1996. do marta 1999. godine posjetio sam Sarajevo više od 30 puta, a od tada sam se vratio još nekoliko puta.

Vidio sam štetu i razaranja koja je rat nanio i infrastrukturi i ljudima. Vidio sam kako su olimpijski objekti oštećeni i praktično neupotrebljivi. Ali vidio sam i nesalomljivu volju jednog grada, čitavog društva, da se ponovo podigne i ponovo izgradi.

MOK se, na inicijativu predsjednika Samarana, brzo uključio u ovaj zadatak, te je odmah nakon Dejtonskog sporazuma odlučio da vodi obnovu Zetre. Dragulj u kruni Igara 1984. godine.

Uz pomoć grada Barcelone, Evropske Unije i svih lokalnih vlasti, posebno Kantona Sarajevo, Zetra je ponovo otvorena 28. maja 1999. godine.

Usljedile su druge rekonstrukcije. Ostali projekti traju duže, ali opipljivo naslijeđe Igara '84, prvenstveno sportska infrastruktura, je tu.

Ali Olimpijske igre su ostavile i nematerijalno naslijeđe Gradu i njegovim stanovnicima. Naslijeđe koje je inspiriralo neuništivu snagu opstanka;

Olimpijski komitet Bosne i Hercegovine

savladavanja svih poteškoća; suživota; solidarnosti; znanja, kako koristiti sport kao element integracije i razvoja.

Čestitam svima vama na ovome. Čestitamo građanima Sarajeva koji u svojim srcima čuvaju Olimpijske igre, a još važnije olimpijski duh. Čestitamo svim institucijama i vlastima grada i zemlje koji su trajno podržavali očuvanje ovog nasljeđa.

I posebne čestitke, uz svu zahvalnost Olimpijskog pokreta, Olimpijskom komitetu Bosne i Hercegovine. Vaš neumorni rad u podršci svim sportistima, na inkluzivan način, bio je važan i za vašu unutrašnju koheziju i stavljanje vaše zemlje na međunarodnu sportsku mapu.

Svima nam je u sjećanju ostala nezaboravna slika ulaska bosanskohercegovačkih sportista na ceremoniju otvaranja Olimpijskih igara u Sidneju 2000. godine, koje su predvodila trojica tadašnjih članova Predsjedništva olimpijskog komiteta, svi iza nove zastave svoje države. Cijeli olimpijski stadion je bio na nogama, a milioni i milioni televizijskih gledalaca također su proslavili ovaj simbolični trenutak.

Ne bih želio završiti bez da vam čestitam i za sve ono što je uslijedilo od tada, sa vašim nebrojenim inicijativama u korist vaših sportista, ali i korištenjem sporta kao vektora razvoja i društvene kohezije.

Kao primjer za to moram navesti vašu izvanrednu organizaciju Zimskog evropskog omladinskog olimpijskog festivala 2019. Veliki uspjeh koji svi prepoznaju, a koji vas nesumnjivo može motivisati da razmišljate o drugim budućim projektima. Hvala vam puno na pažnji, a posebno na dobrodošlici i prijateljstvu, koje sam mogao lično doživjeti tokom mojih nezaboravnih brojnih posjeta vašem prekrasnom gradu.

I kao što je predsjednik MOK-a Huan Antonio Samarán rekao na ceremoniji zatvaranja Zimskih olimpijskih igara 1984:

“Doviđenja drago Sarajevo”



TORVILL I DEAN

Naši dragi prijatelji Torvill i Dean
ponovno u Sarajevu, 40 godina nakon
Olimpijskih igara.





PONOSNI PARTNERI OK BIH

Ponosno predstavljamo naše dugogodišnje partnere
Coca-Cola HBC B-H Sarajevo,
BH Telecom,
Lutrija Bosne i Hercegovine i
NUMBER 1.



Moja priča.



OK BIH i Coca-Cola HBC B-H

Svečano potpisivanje sponzorskog ugovora Olimpijskog komiteta BiH i kompanije Coca Cola HBC B-H upriličeno je tokom obilježavanja 40. godišnjice Olimpijskih igara u Sarajevu. Coca Cola je vjerni sponzor Olimpijskog pokreta gotovo 100 godina!



TOYOTA 40 GODINA ZOI '84

Dugogodišnji sponsor Olimpijskog pokreta i sponsor manifestacije obilježavanja 40. godišnjice Olimpijskih igara u Sarajevu.



GOVOR GRADONAČELNICE SARAJEVA

Benamina Karić

povodom proslave 40. godišnjice Olimpijskih igara u Sarajevu

Uvaženi predsjedavajući Predsjedništva Bosne i Hercegovine gospodine Komšiću, Uvaženi članu Predsjedništva gospodine Bećiroviću, Uvažena i draga predsjednice Slovenije gospođa Nataša Pircmursar, Poštovane nositeljice i nosioci javnih funkcija svih nivoa vlasti u našoj Bosni i Hercegovini, Uvažene ekscelencije, Uvaženi predsjedniče Olimpijskog komiteta Bosne i Hercegovine profesore Rađo, Uvaženi predstavnici Evropskog i Međunarodnog olimpijskog komiteta, Druge kolegice i kolege iz delegacija širom Evrope i Svijeta, Druge moje kolege gradonačelnici, a posebno uvaženi kolega gradonačelnice Grada Istočnog Sarajeva Ljubiša Ćosiću,

Dobrodošli večeras na obilježavanje četrdesete godišnjice Zimskih olimpijskih igara!

Dobro došli u vaše olimpijsko Sarajevo!

Od srca vam želim dobrodošlicu na našu Svečanu akademiju koja je u znaku značajnog jubileja za naše Sarajevo i Državu Bosnu i Hercegovinu.

Večeras slavimo zajedništvo, večeras slavimo ljubav, slavimo naše Sarajevo i slavimo sve ono što su nam donijele Zimske olimpijske igre.

Naše zvijezde večeras koje i poslije 40 godina sijaju istim sjajem su naši olimpijci, gospođa Katarina Vit, gospođa Sanda Dubravčić, gospodin Jure Franko, naš uvaženi Bojan Križaj.

Dobro došli u Vašu kuću!

Večeras se prisjećamo na najuzvišeniji uzlet u historiji Sarajeva.

Obilježavamo četrdesetu godišnjicu Zimskih olimpijskih igara, ali i rođendan naše najslađe i najljepše maskote, našeg Vučka.

Bio je to sportski spektakl po kojem je naš grad u samom srcu Evrope postao planetarno poznat. Bile su to Igre koje su pomirile i povezale cijeli svijet u njegovoj različitosti, i ponijele oreol najboljih do tada organiziranih igara u historiji olimpizma. Sarajevo je tada upisalo novo poglavlje u historiji olimpijskog pokreta. Na to smo svih ovih godina izuzetno ponosni.

Bio je to trijumf organizacije, trijumf zajedništva, trijumf iskrene posvećenosti i gostoljubivosti naših

dobrih, plemenitih i vrijednih ljudi, što i danas krasi moje Sarajke i Sarajlije, moje Bosance i Hercegovce. Bile su to Igre koje su preporodile naš grad, pokrenule njegov dinamičan rast, učinile ga po svemu bogatijim, modernijim i ljepšim. Nemoguće je postalo itekako moguće, vizija i san su postali stvarnost. Zato mi dozvolite da se još jednom kao gradonačelnica našeg grada posebno zahvalim ljudima koji su u to vrijeme bili na čelu našeg grada, hvala gradonačelnicima Anti Sučiću, Emeriku Blumu i Uglješi Uzelcu. Uvijek ćemo se s ponosom i poštovanjem sjećati njihovih imena i njihovog beskrajno velikog doprinosa.

Izuzetno sam ponosna na ovo bogato i inspirativno iskustvo. Sudbina je nažalost htjela da naše Sarajevo, u svom kasnijem hodu kroz historiju prođe pakao. Međutim, naše Sarajevo je preživjelo i izdiglo se.

Ovaj predivni grad zajedno sa olimpijskim igrama uvijek je u sebi nosio, a danas posebno, šalje poruku mira, poruku ljubavi, poruku zajedništva i prijateljstva. Poruku da gradimo mostove, a ne da podižemo zidove i crtamo granicu, poruku da trebamo biti sportski rivali, ali istovremeno živjeti u miru i međusobnom uvažavanju. To je ono što današnjem svijetu treba više nego ikada. Olimpijada je upisana u našoj krvi ona je upisana u životima svakog našeg bosanskohercegovačkog čovjeka. Zašto ne ponovo biti domaćin, zašto ne ponovo biti centar sportkog svijeta? Zašto se ne bi naša sportska borilišta na čudesnim olimpijskim ljepoticama našla u kalendaru

značajnih međunarodnih takmičenja? Zašto naš Olimpijski muzej u srcu Sarajeva ne obogatiti novim medaljama, novim trofejima i uspomena, s obzirom na u posljednje vrijeme izvrsne rezultate naših mladih sportaša koje predvodi skijašica Elvedina Muzaferija i naš sankas Mirza Nikolajev, a od naše Lane Pudar očekujemo i prvu olimpijsku medalju za Bosnu i Hercegovinu. Pokažimo da možemo brže i više i jače kao veliki podstrek našoj mladosti, jer ovo obilježavanje nije samo sjećanje na ono što smo prošli, ovo obilježavanje treba da bude posvećeno budućnosti i našoj mladosti. Poštujmo olimpijski duh, koji nas nikada nije napustio i sve podsjetimo da smo sposobni i spremni i za najveće podvige. Zimske olimpijske igre i Evropski festival mladih EYOF o tome svjedoče. Bili smo najbolji, međutim budimo još bolji. Sjajna prilika su Evropske, odnosno Olimpijske igre mladih u Sarajevu 2028. ili 2032. godine. Na tome ćemo svi zajedno vrijedno raditi. Uz iskrene čestitke još jednom za ovaj okrugli jubilej svim našim dragim sugrađanima iz našeg olimpijskog Sarajeva želimo večeras poslati jednu posebnu poruku našim dragim prijateljima, gradonačelnici Pariza uvaženoj Ani Hidalgo i predsjedniku Francuske gospodinu Emanuelu Makronu, svim Parižanima i Francuzima, uz iskrene želje za uspješnu organizaciju ljetne olimpijade u julu ove godine. Kao što je završio film "Je li kasno?" mislim da nije, mislim da nas očekuje jedna lijepa, svijetla olimpijska budućnost. Uz želje da uživajte u toplini i emocijama večeras, provedite se lijepo i osjećajte se kao i uvijek u Sarajevu.



PRIJEM I konferencija za medije

Gradonačelnica Grada Sarajeva
Benjamina Karić upriличila je prijem u
Gradskoj Vijećnici nakon kojeg je održana
konferencija za medije.



Sarajevo OLYMPIC WEEK 2024

Događaj koji je okupio preko 500 učesnika kroz raznolike aktivnosti poput panela na teme povezivanja kulture i sporta, serijala "Olimpijske priče sa", te takmičenja mladih umjetnika. Ovaj jedinstveni program promovirao je olimpijske vrijednosti i kreativnost među mladima. Kroz interaktivne sadržaje, događaj je ojačao vezu između sporta, kulture i zajednice.





Sarajevo OLYMPIC WEEK 2024

Sarajevo Olympic Week 2024 privukao je preko 2000 učesnika kroz spektakularne aktivnosti, uključujući klizalište na otvorenom, svečano paljenje olimpijskog plamena i veliki muzički događaj s renomiranom DJ-icom Idom Engberg. Događaj je spojio sport, kulturu i zabavu, promovirajući olimpijske vrijednosti i zajedništvo.





Olimpijski komitet Bosne i Hercegovine







**ČESTITKE
POVODOM
40 GODINA
ZOI '84**

EOK EU OFFICE

Dragi Predsjedniče,
Dragi Generalni sekretaru,
Dragi prijatelji,



Hvala vam puno na vašem gostoprimstvu i na divnoj proslavi 40. godišnjice XIV zimskih olimpijskih igara.

Također, sam veoma cijenio što sam imao priliku da se sretnem sa ličnostima koje nužno ne pripadaju sportu, ali koje čvrsto vjeruju u vrijednosti sporta.

Proslava 40. godišnjice zimskih olimpijskih igara u Sarajevu istakla je brojne prednosti Olimpijskog pokreta Bosne i Hercegovine i impresivnu posvećenost ostvarenju olimpijskih vrijednosti i ideala. Ova snažna tradicija će osigurati nastavak uspjeha u budućnosti, za što imate punu podršku EOK-a. Vaš NOK je stub Evropskog olimpijskog pokreta.

Dragi prijatelji, želim i vama lično srdačno čestitati, veliki dio ovoga uspjeha duguje se vašoj nepokolebljivoj ličnoj posvećenosti i strasti.

Generalni sekretar
Raffaele Pagnozzi

OLIMPIJSKI KOMITET SRBIJE

Poštovani,



Koristimo priliku da se Vama i Vašim saradnicima, i na ova način, zahvalimo na besprekornoj organizaciji i izuzetnom gostoprimstvu prilikom posete naše delegacije Sarajevu povodom obeležavanja 40. godišnjice Zimskih olimpijskih igara.

Neizmerno nas raduje što je proslava protekla u najboljem redu. Organizacija

događaja, kao i sve popratne aktivnosti, bila je zaista na visokom nivou. Pažnja posvećena detaljima i trud koji ste uložili učinili su boravak u Sarajevu nezaboravnim. Vaša iskrena toplina i ljubaznost dali su posebnu notu celokupnom iskustvu, čineći ga još prijatnijim i sadržajnijim.

Uvereni smo da će naša saradnja ostati na najvišem nivou i u budućnosti.

S poštovanjem,

Predsjednik
Božidar Maljković

Generalni sekretar
Đorđe Višacki



OLIMPIJSKI KOMITET SLOVENIJE

**Poštovani gospodine,
poštovani predsjedniče,
Dragi Izet!**



U ime vodstva Olimpijskog komiteta Slovenije još jednom Vam zahvaljujem na posjeti u Sarajvu i obilježavanju godišnjice nezaboravnih Olimpijskih igara u Sarajvu. Igre koje su obeležile Jugoslaviju i sve generacije koje su, usprkos mladosti, svjesne koliko je 1984. godina važna za Olimpizam, razvoj zimskih sportova i našu olimpijsku porodicu. Vaša organizacija ove komemorativne manifestacije najvećeg sportskog događaja ikada održanog na prostorima bivše Jugoslavije bila je izuzetna i nezaboravna.

Ne samo da je događaj organizovan uz veliko poštovanje prema Igrama, sportistima, osvajačima medalja i istoriji, već je i vaše gostoprimstvo bilo na najvišem nivou. Posvećenost uspješnom izvođenju manifestacije, naporan rad svakog pojedinog člana vašeg nevjerovatnog tima i cjelokupni olimpijski duh koji se osjećao tokom naše posjete još uvijek ispunjava grad Sarajvo, vratili su nam mnoge divne uspomene, za koje vjerujemo da će zauvek nas ujediniti.

Pisao se je 14. februar 1984. godine, kada je alpski skijaš Jure Franko osvojio prvu olimpijsku medalju za Jugoslaviju i postao olimpijski vice šampion sa samo 22 godine. I ne samo Franko, nego i Vučko, Meta Hrovat, Ivo Čarman, Bojan Križaj, suze sreće, iskrena prijateljstva, besplatni školski časovi i glasno pjevanje himne prilikom podizanja pobjedničke zastave, naše zastave. Sve je to bilo Sarajevo 1984. godine.

Srebrne igre jugoslovenskog doba. Tamo su bili svi oni koji su na bilo koji način doprinjeli organizaciji najvažnijih Zimskih olimpijskih igara i zajedno napisali povijest zimskih sportova i rođenje prvaka sljedeće generacije.

To je bilo upravo ono što ste pripremili u čast pobjedničkih olimpijskih igara Jugoslavije. Zajedno smo se podsjetili, koliko je važno držati se zajedno. Šta znači nacionalna svest, suze sreće i tuge, i koliko je važno stati uz naše sportiste i u vreme pada, a ne samo uspona. Sjetili smo se srčane zakletve kao i svih nevjerovatnih rješenja za naše sitne izrazove, koje znamo i možemo na tako simpatičen način riješiti samo mi. Imali smo čast sistnuti ruke uživo svima koji su pisali olimpijsku bajku na skijaškim stazama i klizalištima, a mi smo ih sa bratskom ljubavlju gledali na televizijskim ekranima u to vrijeme. Podsjetili ste nas na vrijeme kada smo svi bili sportski entuzijasti, bez obzira na spol, nacionalnost ili dob.

Voljeli bi smo da vidimo još ovakvih događaja. Događaja trijumfa, sreće i srčanosti. Radujemo se nastavku pisanja olimpijskih bajki u Parizu. Barem onoliko trenutaka sreće, slušanja himni i trijumfalnih dizanja ruku.

Olimpijski pozdrav!

Generalni sekretar
Tomaž Jontes

Presednik
Franjo Bobinac

OLYMPIC SOLIDARITY

Dragi Predsjedniče,
Dragi prijatelji,



40. godišnjica Zimskih olimpijskih igara Sarajevo 1984

Hvala vam puno na pismu od 13. februara 2024., u vezi sa gore navedenim.

Po povratku u Lozanu, takođe želimo izraziti našu duboku zahvalnost za toplo gostoprimstvo koje nam je ukazano tokom naše nedavne posjete u Sarajevu. Zaista, bilo nam je veliko zadovoljstvo i čast učestvovati u različitim manifestacijama povodom proslave 40. godišnjice Zimskih olimpijskih igara 1984. godine, koje su održane u vašem prelijepom gradu. Možemo potvrditi da smo i mi u Sarajevu osjetili olimpijski duh koji je još uvijek živ i nadamo se da će se tako nastaviti još mnogo godina.

Hvala vam još jednom i želimo vam sve najbolje za vaše buduće ciljeve.

Srdačni pozdravi,

Iskreno,

Viši savjetnik
MOK predsjednika
Pere Miro

Koordinator MOK fonda
solidarnosti za Ukrajinu
Pamela Vipond

DAVOR SUHAN

Poštovani!

*Autor sam romana **Bolero** koji je izašao 2011. godine u izdanju nakladničke kuće PROFIL. Čestitam na nedavno obilježenoj Obljetnici.*

Srdačan pozdrav

Davor Suhan



40. godišnjica

Olimpijskih igara u Sarajevu

Izdavač

Olimpijski komitet Bosne i Hercegovine

Za izdavača

Dr. sci. Said Fazlagić, Generalni sekretar OK BiH

Urednik

Prof. dr. Izet Rađo, akademik

Recenzenti

Marijan Kvesić

Prof. dr. Milanko Mučibabić

Lektura

Olimpijski komitet Bosne i Hercegovine

Prelom teksta i dizajn

Agencija VS Design

Fotografije

Suada Ramić

Amel Emrić

Arhiva OK BiH

Štampa

Štamparija Fojnica

Tiraž

100

Sarajevo, 2024.

ISBN 978-9926-8154-6-2

